

AI lectur!

Objektyp: **Preface**

Zeitschrift: **Il glogn : calender dil pievel : annalas per historia, litteratura e cultura romontscha**

Band (Jahr): **19 (1945)**

PDF erstellt am: **17.07.2024**

Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

Ein Dienst der *ETH-Bibliothek*
ETH Zürich, Rämistrasse 101, 8092 Zürich, Schweiz, www.library.ethz.ch

<http://www.e-periodica.ch>

AL LECTUR!

Il Glogn 1944, ni sco el vegn era numnaus «*il Glogn dil Cumin la Cadi*» ha giu gronda accoglientscha. Secapescha, oravon tut naven da Glion ensi! Encuntercomi ha beinenqual fideivel lectur dil Glogn ord la Foppa, Lumnezia, Rueun e plinengiu buca cumprau quel, culla viarcla, «che dils seludeuners e politichers della Cadi hagien els pauc interess!»

Udend jeu quella remarca tscheu e leu, ein ils plaid de Dr. C. Decurtins vegni endamen a mi. Lez ha scret, detg e repetiu: Ils Romontschs han in sgarscheivel pign horizon, cura ch'ei setracta de caussas che pertuccan mo in' u l' altra de lur valladas ni cumins! Lu ein ei pigns e cuorts de vesa, pertgei che scadin vesa mo *sia* vischnaunca, *siu* cumin ed auter nuot. — Quella sentenza ha tucc la nota el ner! — Da l' altra vart vegn in e scadin che patratga in techet a stuer conceder, ch'ei seigi tuttavia necessari ch' ils Romontschs de tuttas vischnauncas e cumins sursilvans enconuschien in l' auter era historicamein.

Quels della Foppa e Lumnezia san pia esser segirs, ch' il Glogn vegn en cuort a risguardar era lur contrada, lur cultura e historia. Ils Glogns 1946 e 47 vegnan a vegnir dedicai alla Foppa e Lumnezia ed jeu sun perschadius, ch' ils della Cadi ed ensumma tuts ils Romontschs de leusi, vegnan a s' interessar grondamein de lur stimai vischins dador las purteglas de lur vischnauncas. —

Uonn ei il Glogn dedicaus alla Val Medel. Jeu hai fatg quei quella uisa, che scadin buca Medelin vegn a leger e studiar quel cun tschaffen ed interess; cun buca meins grond ch' ils de Medel sez. L' historia della Val Medel ei gia vegnida tractada en bunas e fetg bunas lavurs. Aschia per ex. da Dr. P. Iso Müller, Sur Giohen Venzin, Sur canoni e prof. Aug. Giger e buc il davos dal Glogn sez, entras la profunda e zun bein documentada ed illustrada lavur de Sur Gion Batt. Sialm, plevon de Trun: «Sanctuaris a Medel» (Glogn, 1931, 5avla annada).

Sch' jeu tuornel a dedicar las paginas dil Glogn alla romantica Val Medel, sche daventa quei oravon tut per buca starschar interessantissimas scenas culturalas, sco era personalitads originalas ord quella vallada ualti zuppada ed isolada. Tun e tempra de quest Glogn ein denton aschia, che scadina contribuziun historica, culturala, folcloristica e litterara sa e dueigi interessar e delectar in e scadin dell' entira Part sura.

Per saver realisar il Glogn 1945 sund'jeu staus sfurzaus de mulestar beinenqual Medelin cun damondas e retschercas de tutta natira: oravon tut sgr. Clemens Pally, scolast secundar, Sur Riedi, plevon de Medel (al qual jeu engraziel spezialmein, ch'el ha schau rugadar neunavon mei ils scazis digl archiv della pleiv), Mistral Martin Bundi, Leonard Lutz, bostger de Medel, Luis Capeder, la tradiziun incarnada della Val, sgr. prof. Aug. Giger, sgr. prof. Dr. Benedetg Giger, Sviz ed ingenieur Albert Lutz, Cuera. A tuts ils numnai, sco era als auters biars, miu pli sincer e cordial engraziament per lur pazienza, sustegn ed agid.

Havessen nus dil Glogn ina buorsa gronda, stagnada cun marenghins, sco da siu temps ils renomai marcadonts de stiarls de Medel e Tujetsch, nus havessen schau seglir quels utschals della cua melna ed illustrau il Glogn, ch'in e scadin dils lecturs havess survegniu in'idea completa della biala Val Medel. Mo la fin finala sto ei era tonscher cun quei che nus purschein en sincera veneraziun e carezia pils stimai Medelins e per tut ils Romontschs lunschentuorn, che veglien adina sespruar d'emprender d'enconuscher in l'auter meglier e meglier, sinaquei ch'ei detti in di buc in soli Sursilvan, ch'enconuschi buca ses vischins, si' historia locala e siu character tut agen. — —

Furiond la stermentusa uiara aunc adina entuorn entuorn nossa cara patria, lein nus engraziar de tut cor alla divina Providentscha, che nus Svizzers e Grischuns essan aunc adina sauns e salvs e che nus astgein cultivar tut il bi e bien per pievel e tiara en buna pasch e relativa concordia. — Vegli il Segner proteger e mantener nus vinavon, schebi che nus havessen buca meritau bia meglier che la gronda part dils pievels europeics en miseria ed agonia. — Quei detti Dieus!

La redacziun.